

Golosi **Neala olelo oboba**

Golosi gaamu amoda bolobinisi Esiaïe Ebesa gaamu ga madela adadi eso maasido dilo. Foloea made, dolö odoaea Golosi udia dolöma Ado Mala Hedabi säla olelesebegi, udia dolö odoa nefolalo amolia asigi besula Yesuma asigi afädë negei.

Amala hamosebegi, Geleso sosogo Golosi nefolalo amolima, dolö odoaea Godeïe mala dofä dibe amo gadola made säla olelesa neala säsebe amo nabalahilä, Foloea beba we dödëla ï. Godeïe mala dofä dibe amo gadola made säla olelelo nefolalo amolia sähalea, Gode neebe amo hedabola helësëla, ïe damula aulo neala gausa maademolöie, mudaia sigi aligilo nefolalebe amolige, busa nefolalebe amolige helësëla ëi gauia adamolö dialeala säi.

Ilia amomu made, mala elö elöla hamomolöge, made hamomolöge säla digi, gafodo damumolö dialealage, amo gadoi yafie säla olelesa nelo. Ado amo nabalahilä, Foloeada amolia Godeïe mala dofä dibe amo gadola made olelei gabula helësëlahilä, Godeïe mala dofä dibe amo dödëla ilima ï.

Foloea beba amo dödëla dolö äudäma ï. Dolö elö amoïe ëida Digigusi, elö amoïe ëida Onesimusi. Elea gaula mosäia ï. Onesimusi eda, galabaia hamoi gadoi hamolasilo nelo. ïe dafidilo ëi Filimonoma beba elö Foloea dödëla ï amo dialea.

Geleso eda nelebo dibe
sulubadelaïe busa neada, namolö

sulubadelage, Godeïe mala dibe amoge ema nobai nea

(Golosi 1.1-3.4)

¹⁻² Neda Folo, Gode hile hamelo dibe amea, Geleso Yesuïe abosolo neawe. Nedoo nalifi Golosi gaamugi Gelesoma asigi afädë negela, ema dila nefolalebela dilima, nilile nedoo Dimodi alia beba gowe dëdëla ïasisago.

Nilile Naado Godea dilima ugila negelasiloge, neala dalulasiloge ïmäia hamesa neawe.

Golosi ilia Yesuma asigi afädë dofä negei

³ Alia dilile Godema adosaleada, segeyo sulubadelagi nilile Dafidilo Geloï Yesu Gelesoïe Eedo Gode neebe amoma nesegeamu aligilomelë. ⁴ Dili nefolalebe goea Geleso Yesuma asigi afädë negei amo, amo wälasi nebegoge, amase, Godeïe udia dolö sulubadelama boba hahamosa nebegoge, alia nabalahlä, nesegea aligilo. ⁵⁻⁶ Ado dofä amoda, Ado Mala Hedabi dili neebea besela galasebegi, asigia sisiläfüsa namolö amoda, nabi gomelë. Selesaia mosöa musügä negei amoïe dilia asigia sisiläfüsa neebe goeada, dilia asigi afädë negesa nebegole, boba hamosa nebegolemelë. Ado Mala Hedabi ameada, sege sulubadelagi bäula edelahilä, gägä negelasilo nea. Diliage ado amo dafidi mi gäwila nabalahlä, Godea ugila negelasilo i amo hedabola helësëla, dofä gabula beagolesolo amo gala, amo gadolamu gägä negela bäulasisamu nelo. ⁷ Ado mala amoda, Ebafolesaea dilima säla olelei. Eda nilile damelë obeägilo nilibalä hamoi gedola hamolasilo nea. Eda asigi falagasei nea, dili ugila negela, Gelesoïe

hamoi hamosa nelomelë. ⁸ Godeie Gesamia odoa boba hamolo dilima i amo, Ebafoolasaea alima ulufala säla imelë.

Golosi ili gelolasila Foloea Godema adolasi

⁹ Dilile säla iäsebegi, dafidi nabia amila alia Godema dilile adolasisamu nelo amo neamelë. Asigi falagasei namolöle, helësölöle, ie Gesamia ilo dibe ameadä, Godea hamese amo gadola helësölo amo dilima nobamäiaie adolasisamu neamelë. ¹⁰ Amala adosebe amoie mida, dilia Godeie mala bögëmolö dibe amo gadola bögëla awäla, Gode neala obeägimäiaie adolasilo. Amoda gomälä. Hamoi hedabi amoli sulubadelagi dilia gägä negemäiäge, Gode dawadigilo amo edemäiäge, ¹¹⁻¹² dili mia yöi dibe amo sulubadelagi, aabela made habobala, aso maadela, gelola namiäiaie, ie geloi hido elöia geloi sulubadela iala, dili neala gelolasimäiäge, amase, Godeie udia dolö yo digalo neeäbe ami neegi, ilima imolö daiala negei dibe amoda, Naadoea dili neala hedabolasi amea, dilimage mogela imolö amogi, ema obeägila neseägesa namiäiäge, adolasilo. ¹³ Gasimi sagaloie geloia nili gide beägei dibe amo beala, Naadoea nili naabogi gaula, ie malö boba hamoi neeäbe amea beaha maadela sigi neeäbe ami nili sigi maala ifosi. ¹⁴ Malö ameadä nilia nafade hamoi amo hëla fisilahilä, nili fisigäla ifosi nefolalea.

Gelesoie mala amoge hamoi hamolo amoge Foloea säi

¹⁵ Nilia Gode made melëlo gaso, ie malöda Gode hi e gadoi nea. Eda ie malö abulümi neada, Godea hamoi dibe neeäbe seäbe amo sulubadelaie busa nea. ¹⁶ Godea ie malömadila mudaia

neebe amolige, nagadaia dibe neebe sebe amolige sulubadela hamoi. Siia bimolöi dibe neebe sebe amolige, bimolöi made dibe neebe sebe amolige, sigi aligilo nefolalebe amolige, dafidilo nefolalebe amolige, mudaia geloi elö elöla nefolalebe amolige, sulubadela emadilamu aligila hamoi. Godea ie malöie namiäia hamoi amolida, sulubadela ie malömadilamu hamoi. ¹⁷ Amoli sulubadelada dafidi nelö made, Geleso e dafidi nelö amo nea. Sulubadela dibe neebe sebe amolige, made balälemäia gaula aligilo nea. ¹⁸ Geleso sosogo nefolalebe amoli sulubadelada, ie domalo nea, hi eda busa nea. Domalo amoie namolö mida, hi e nea. Sulubadela dibe neebe sebe amoiege, busa hi emu namiäia, malö abulümi nelö amo baagola, baagoi bauiala mi gäwila nowelasi. ¹⁹ Godea hamei amo gadola, ie namolö amoge, mala amoge sulubadela ie malöma nobamäia hamelahilä, Gode hi ie malöma nobalasi. ²⁰ Hä, malöea hamoi ameadä, nelebo sulubadela dibe neebe sebe amolibalä ado nii neebe amo nufuda salimäia helösäi, nagadaiaige, mudaiage. Ie malö i fügäigi baagola, ie heale digai ameadä, Godea sulubadela ebalä neala aealasi. Aealasi ameadä, amala nufuda sali.

²¹ Dafidi dilia Gode baagi äala wagadi made nelö. Amoda dilia mala nafade hamosa nelö amea iso asigigila Godebalä ado neala nelömelä. ²² Gaso, waliöda, hä, dilima asiai maade, nafade made baai, mogoi eleloi neegi, ie sidaia sigi moholöie, ie malö domalogi baagoi amea, dilibalä ado nii nelö amo nufuda sali neamelä. ²³ Amai gaso, dilia Godema asigi afädä negei amo, fologola made, amo wälasi nea, Ado Mala Hedabi nabi ameadä,

asigia sisiläfüsa namolö i amo, nigia gala fisila made, gaula fëdöla namolö dialea. Ado Mala Hedabi dilia nabi amoda sege dibe sulubadelagi säla iaha maadei. Neda amoie hamoi hamolasilo Folo neawe.

Folea Geleso sosogo nefolalo amolile hamoi hamolasilo nelö

²⁴ Na dilile së nase wegi obeägisa neawe. Geleso sosogo nefolalebe amoli sulubadela Gelesoie domalo neebe amoie, na nihile domalogi ilile së nasebe ameada, Gelesoea dafidi së naala idiadoi amo na së naala baahadio. ²⁵ Geleso sosogo neebe amoli sulubadelaie hamoi hamolasilo namiäia, Godea ne memelela ifosi neawe. Dili hedabi namiäiaie, ea hamoi amo na hamomäia nema i. Gelesoie ado mala dibe amo sulubadela dilima säla olelemäia, hamoi amo nema iasio. ²⁶ Amoda mi gäwia amila udia dolö nefolalo amoli sulubadelama ulufadigi made, musügä negesi dilo amo walioda, hä, hile udia dolö ilima ulufala olesa nea. ²⁷ Hile hameloea, ado musügä negesi dilo amo Godea ie udia dolö amolima ulufala olei. Ado amoda hedabi hido elöi amo helësëmäiage, amase, udia dolö fifii asi nefolalebe amoli sulubadela ado amea ugila negemolöi gabula helësëmäiage, amala hamoi. Musügä negesi dilo amoda gomalä. Geleso eda dilile isogi dilibalä neebe amomelë. Amala neebe ameada, Godeie hedabi hido elöi namolö dibeami namolöila helësëla, asigia sisiläfüsa namialo.

²⁸ Hä, dofä asigi falagasei nea, nilia säla iadigi, hamogila digi, säla olelela digisa aligise ameada, ie säla ulufalo neamelë. Udia dolö neebe amoli sulubadela Gelesoma dilahilä, asigi hedabi negei

nefolalebe amoli, Godeie siigi, sigi gaula moholöie, amala hamosa aligilomelë. ²⁹ Hamoi amo hamosa maademolöie, ea ie geloi edefadea ne neala gelolasisa neëgida, na aso maadelahilä, hamoi amo baagi sëi edefade hamosa neawe.

2

Nilia asigi afädë negei gelola nea, wäfalï ado säse neadigimolö

¹ Dili nefolalebe diliage, udia dolö Eleodisia gaamugi nefolalebe amoliage, udia dolö ne made melëlo nefolalebe amoli sulubadelaage, na dili ugila negemolöie baagi sëi nea, hamoi hamosa neebewe helësëmäiala hamesamelë. ² Na dili sulubadelaie iso asigi gelolasimolöge, dihilimu boba hamola dila aeala namiäiage, amoie hamoi hamosa neawe. Dili amo gadoi neada, asigi hedabi neaha maadelahilä, dilile asigi afädë negei amo dofä gelomolömelë. Hä, Godea ado dafidi musügä negei dilo amoda, dilia dawadigimolömelë. Ado musügä negei amoda, Geleso hï emelë. ³ Asigi falagasei namolöle, dawadigilole hedabi hïdo elöi amoli sulubadelada, Gelesoma musügä negei dialea.

⁴ Na dilima säseweda, odoaea ado hedabi hïdo elöi säsebe amea dili gadiabola dahila neloeaie sähamelë. ⁵ Ne dilibalä nea made gaso, nie asigi gesamileda, dilibalä nea. Dilia Gelesoma asigi afädë negei amo fologola made nea, mala mogoi hamosa nebege bealahilä, na edefademalä obeägïsa neawe.

Nili Gelesobalä dila nea, namolö gähe gaula namolö

⁶ Dilia Geleso Yesu e dilile Dafidilo Geloï namiäialahilä, neala gauï amo gadola, ebalä dila namolöï namialo. ⁷ I nagagi difi aulo amo gadola, dilile difi ema awälahilä, osogolodaia mosö olelo amo gadola dilile namolö Gelesoma diia adogola namialo. Dilima säla olelei amo gadola, dilia Gelesoma asigi afädë negeï amo gelola namolöï nea, nesegemolö nobala adugamäia namialo. ⁸ Dolö odoaea dolöïe dawaea dili dahila neala, ado iso gäwi made säsebe amea, dilia asiala ilia helësëse amo bégëla awäla, ie memalä galabaia hamoi gadoï hamolasilo aligiloea idihë namialo. Iliada Geleso mi hamolo made, hilile maüïe mala olelei amoge, nagadaia galuge, mugabege, mi hamola sälo nea. ⁹ Geleso e dolö domalo nea, hedabi hido elöï elö elöla Godema nobai dibe amolida, ema nobai dialea. ¹⁰ Diliage Gelesoma dila nebegi, namolö dilima i ameada, namolö amo dilima nobaha maadeï neamelë. Gelesoda, nelebo geloi elö elöla dibe amo sulubadelaïe busada, e neamelë. ¹¹ Gelesoma dila nea, fagulo gäï gilo amo gadola nagadaia mala gäï amo ami gila fisila, dili gafodo damui nea. Amoda dolö naaboea dagaboi made, Geleso ea dagaboi. ¹² Dili ödägi geï ameada, Gelesobalä gedola bauri amomelë. Gode e geloi edefade neebe amea, Geleso e baagoiala nowelasi neebe amoma dilia asigi afädë negesebegi, dilige Gelesobalä gedola nowela ifosi neagomelë.

¹³ Dili dafidi nagadaia mala hawa neada, asiala hamosamu nelo amea, dili baagoï gadoï nebegi, Godea dili Gelesobalä neala nowela ifosi amo

neagomelë. Nilia asiala hamoi amo sulubadela Godea hësa maadeimelë. ¹⁴ Ado säla negei amo damula, nilia nafade hamosa nelo ameada, bidi negei nebegi, Godea neadigi. Ado säla negei amea hamomolö dialeala säi ameada, nilibalä ado neala gide begei dibegi, Godea neala gaula awälahilä, Gelesoie i fügäidaia baala fisimolöi fisi. ¹⁵ I fügäi amodaia Gelesoea mudaia sigi aligilo nefolalo amolige, beaha aligilo nefolalo amolige, ilile geloi hamolo nefolalo amoli sulubadela damusa maadelahilä, udia dolö sulubadelaea bimäia, na baagila asimelëla säla, ili gide begela gaula molöi asi.

Nilä Gelesobalä baagoi ameada, ado säla negei elö elöla difolalebe amea nili ugila negemolöi made dialea

¹⁶ Ameada, dilia molö nase ameage, ödä nase ameage, amase, segeyo edefade amoiege, aube gähe olei amoiege, molö giala nulo segeyo bëgëla hamose ameage, segeyo Sabadaie mala amo gadola hamose ameage, odoaea dili mogelasila asiala hamoimelëla sämolöda, dofea mademelë. ¹⁷ Mala amolida, hobeala moholö amoie ausulubo gadoi dialea. Hodo dofäda, Geleso hi emelë. ¹⁸ Afädëa wäfali dihï nagadaialo gadoi namolöi galealage, selesaia fii ei gauia adogola sämolöi galealage, dilia hamoi amoie bidi nimolö amo made neloeala säsedä, ie ado made nabala, idihë namialo. Dolö ameada simasia meli amoie ado yafie memalä säla dabola, nagadaia mala helësëla, mi maade amogi, gugusäla bimäia säse amea, ¹⁹ ea Geleso nilile busa neebe amo gaula aligilo made nea. Busa ameada domalo nelebo hulu

dibe amoma geloi ïala, domalogi moma gumu, dii sulubadela amea iilasila, Godea hamese amo gadola ëdëlasilo neamelë.

²⁰ Dili Gelesobalä baagoi ameada, nagadaia nea hamolo ameage, mugabeïe geloi ameage, dili dafidi gide begei dilo amo fisigäi neagomelë. Amala neada, nagadaia mala hamolo nefolalebe amea hamosa neebe amo gadola, dili made fisigäia hamolo amo gadola wäla hamosa nebegoda mi edoïe. ²¹ Iliada ado sälo amoda gowe gadoi. Gowe nimabio. Gowe muabio. Gowe diigimabiola sälo. ²² Amolida, dafidi dolö hi hamolahilä, säla olelela hamomalalo. Ameada, mala amoli sigälo dialeamelë. ²³ Dolöea hi asigia göa nelegeloge, wäfalä nagadaiai gadoi aligiloge, gafodogi sëmäia hamologe, mala amoli gadoi helësësalea, asigi nulügäi hedabia säla negei gabula helësëmolöi gaso, mala amoli gadoi hamose ameada, domaloïe gesami aulo dibe amo fisimäia hamolo made nea.

3

Nili Gelesobalä baagola nowei

¹ Godea dili Gelesobalä neala nowelasi neagomelë. Amala hamoi neebe ameada, dilia selesaia mosöa Geleso hïle filodaia, Godeïe naabo dafädimadi sebea ami nelebo dibe amoli helësëla, amida dilile boba gosala namialo. ² Nagadaia nelebo dibe amoli helësëla made, nelebo selesaia mosöa dibe amolimu helësësa namialo. ³ Dili baagoi nea, dilile namolö Gelesobalä, Gode neebea ami musügä negei neagomelë. ⁴ Dilile namolö gähe Geleso hi e neebe amo ulufadigisolo

amo gala, dilige ebalä, ie yo digalo hido elöi amola ulufadigimolömelë.

Geleso e nilile isogi neebe ameada, nili gähe nea

(Golosi 3.5-4.18)

Nili gähe nea

⁵ Amamolö ameada, nagadaia mala amea hamelo amoli baagosa maademalo. Amolida, udia dolö susugu hamologe, nigime baai mala hamologe, gesami auloge, hamela diigiloge, gesami awäla naamu negemolöila helësëloge, amo sulubadela baagosa maademolöi maademalo. Gesami aulo amoda, nelebo odoama göa negelo mala amo gadoi dialea.

⁶ Mala amoli gadoi hamosalea, Godeie ado neadigilo nefolalebe amolima Godeie habobalo moholömelë. ⁷ Dafidida, mala amolia dili sigi nea, ilia hamomola säse amo gadola, dilia bögëla hamosa nelo amomelë.

⁸ Amaimo, walioda mala egowe ili gadoi sulubadela fisisa maademalo. Habobaloge, mi-halälloge, nafade hamologe, gagadeloge, baagido säloge, dilile nafi idigila ado nafade säloge, fisisa maademolöi maademalo. ⁹⁻¹⁰ Asigi goofu, ie mala amola gila fisilahilä, asigi gähe salugai neebe ameada, dilia dihilimu wäfalä sämabio. Asigi gähe amo hamolo Gode neebe amea, hi e gadoi namiäia, ea dili bedefalasila, e neebe amo dawadigisa maademäia, dilima amala helësëlasisa neamelë. ¹¹ Asigi gähe amogi, nili sulubadelada, afädëdi nea. Yu udia dolöle, Giligi udia dolöleda maade. Gafodo damulole, made damuloleda

maade. Amase, sege elögi fiige, mala melëlo made gadoi hamologe, galabaia hamoi gadoi hamolasiloge, fisigäige, maademelë. Mi hi eda, Geleso nea. Eda nili sulubadelaie isogi nea.

Nilia odoa boba hamomolö dialea

¹² Godea dili boba hamola ie namiäia, ea dili memelela ifosila, hile udia dolö nefolaleagomelë. Amala nefolalebe ameadä, dilia bobasëmolöge, ugila negemolöge, dihili nagadaiala namolöge, amase, hedabola beala geleä hamomolöge, aabelä made habobamolöge, amoli gadoi salugala namialo. ¹³ Dili nebegoea odoaie mala beala, weda abidä amahadula helësësedä, made säla, fisimalo. Amase, dilia nafade hamoi amo Dafidilo Geloia hëla fisi amo gadola, diliage odoaea nafade hamose amo hëla fisimalo. ¹⁴ Hedabi hamomolö amolidaiada boba hamolo amo bu salugamalo. Boba hamolo ameadä, mala hedabi hido hidola dibe amoli sulubadela neala afädëfalä hamolasila, hedabi hido elöi hamola neala gedolasilo nea. ¹⁵ Dili domalo afädë nea, Godea dili dalulasimäia wei ameadä, Gelesoea neala dalulasilo dilima i amo helësëla, dilile iso asigigi hedabola memelela hamomalo. Amala hamosa neadä, nesegesamu namialo. ¹⁶ Dofä asigi falagasei nea, dilia dihilimu säla olelela digisa neage, neala hamogila digisage, namialo. Amase, gë udähalea, Gë Udälo bebägi dibe amolige, Godeie ei gauia adogola gë udälo amolige, Eleloi Gesamia dilima gë udälo olelesebe amolige, udäha namialo. Amala hamosa neadä, dilile iso asigigila Godema nesegesa nea, Gelesoie ado hido elöi asigi dafidilo namolö dibe amoda, dilile isogi negesiä namialo. ¹⁷ Amaimo, Yesuie

aulodaia nea, Naado Godema nesegea neada, dilia hamosebe amoge, säsebe amoge, sulubadela Dafidilo Geloï Yesuïe ëigi nea, hamomalo.

Folea sosogo ilile säi

¹⁸ Udia dolöma fii sefolalebela dili-e, dili Geleso sosogo salea hamomolö dibe amo gadola, dilile diguaea hamomola säse amo nabala ili hawa namialo. ¹⁹ Dolö udia nii nefolalebela dili-e, dilile udia sëmäia yölasila made säla, boba hamosa namialo.

²⁰ Malësä-o, dilile diado diemelea ado säse amo sulubadela, nabala hamomalo. Amo gadola hamosebe ameadä, Dafidilo Geloï neala obeägïlasisa neamelë. ²¹ Malö eedo nefolalebela dili-e, dilia dilile malö yölasisegi, ili dofea madela helësëia idogolea, egedidigila sämabio.

Folea hamoi hamolasilo ililege sigi aligilo ililege säi

²² Galabaia hamoi gadoi hamolasilo nefolalebela dili-e, dilia dilile sigi aligilo nagadaia nefolalebe amolia hamomola säsebe amo gadola, sulubadela hamosa maademalo. Ilile sidaiamu made, amase, ilia hedabi hamolo neala sämäiamu made hamomalo. Amala made, dofä asigi mogoi negei nea, Dafidilo Geloibalä bedäla, e helësësa nea, dilile sigi aligilo amolia säsebe amo bëgëla, hedabimu hamosa namialo. ²³⁻²⁴ Dafidilo Geloia dilile bidi daiala negei dibe amo ïmolö helësësa nea, nelebo sulubadela hamosebego hamosaleada, dolöïe hamoi hamolasisala helësëla made, Dafidilo Geloïïe hamoi hamolasisala helësëlahilä, dilile geloi sulubadelaëa hamomalo. Dilia hamoi hamose amoda, Dafidilo Geloï

Gelesoie hamoi hamolasisamelë. ²⁵ Nafade hamosa neebe ameada, nafade hi hamose amo gadola, se ia obegemolömelë. Godea udia dolö memelelahilä, hili hamoi amo gadola, nofela made, afädädila mogemolömelë.

4

¹ Sigi aligilo nefolalebela dili-e, dilile galabaia hamoi gadoi hamolasilo nefolalebe amolima mogola hamomolö dibe amo gadola, nofela made, afädädila hamosa namialo. Diliage dilile sigi aligilo selesaia mosöa neebe amo helësëmalo.

Nilia Godema adomolö amo gelola bögësa nea, mogola namolö dialea

² Godema nesegela säla, hedabola helësëla idihë nea, Godema gelola adosamu namialo. ³ Amala hamosa neada, dilia nililege adolasisa namialo. Amala säседа, nilia Godeie ado mala Gelesomadi aligila dafidi ulufadigi made negei dilo amo säla imolöie, Godea nili fu iala, idi doga negemäia, adolasisa namialo. Mi amoieda, ne walio galabaia neawe. ⁴ Na udia dolöma ado mala ulufala säla imolö dibe amo gadola säla iduläie, Godema adolasimalo.

⁵ Udia dolö segea nefolalebe amolibalä neada, hedabola helësëla asigi falagasei namialo. Mala hedabi hamomäia, fu i dibe amogida, memalä namiabio. ⁶ Odoaea dilima ado säsegi, dilia ili sulubadelama hedabola gomalä säla obegemolöla helësëmolöieda, molögi ebä baalo amo gadola, ili ugila negemolöila helësëla, ado hedabola sälo namialo.

Folea Digigusile Onesimusile Golosi fisiga gai

⁷ Na hamosa neebeweie adoda, Digigusi ea dilima säla imolömelë. Eda nedoo obeägilo asigi falagasei nea, hamoi hamosamu aligilo. Dafidilo Geloie hamoi nilia gedola hamolasisa aligilomelë.

⁸ Ea nili neebwea hamosa neebeweie ado dilima säla imäiage, dilile iso asigi gelolasimäiage, na e dili neebee fisiga gaseweie mida, amoiemelë.

⁹ Nilile nedoo obeägilo Onesimusi e asigi falagasei nea, diligi sosogo afädë neebe amo, eege Digigusi helegela moholömelë. Wi hamose amoie ado sulubadelada, ele dili neebee maala, säla iaha maademolömelë.*

¹⁰ Alisadagusa e haligila galabaia neebe amea, dili hawiola säsisebego. Banabasaie esago Magaeage, amo gadola wäla hawiosebego. E dili neebee maaseda, dilia e säla olela gausialahilä, e gauia idogomalola na dilima dafidi säla i amomelë. ¹¹ Yesu, ie ei elö Yasadusi eage dili hawiola säsisebego.

Udia dolö Godea Beaha Maadela Sigi Neebee ami namiäiäie nebalä hamoi hamosa neebe amoligi, dolö ohodoa amolimuda, Yu dolömelë. Ila ne edefademalä ugila negesa nelomelë. ¹² Ebafolasa eege diligi sosogo afädë nea, Geleso Yesuie hamoi hamolasilo neebe ameada, dili hawiola säsisebego.

Dili asigi fädäi nea, Godeie mala dawadigila neebe amo gadola gelola namiäiage, Godea hamei dibe amo sulubadela dawadigisa maadelahilä, fologola made namiäiage, dili helësëla ea segeyo sulubadelagi Godema adolasisamu neamelë.

¹³ Ea dilile hamoi baagi sei edefade hamolasi

* **4:9:** Onesimusi eda Filimonoie galabaia hamoi gadoi hamolasilo nelo. Filimono bebagi dibe amo bimalo.

amo na meli ameada, dofä amala hamolasisala sämolöi neawe. Ea udia dolö Eleodisia nefolalebe amolilege, Hielabolisi nefolalebe amolilege, amala hamolasisa neamelë. ¹⁴ Nilile alögoda obeägilo dolö Ulugu Demasaleage, aso, dili hawiola säsisebego.* ¹⁵ Geleso sosogo Eleodisia nefolalebe amolima, nilia ili hawioila säsimelëla säla imalo. Udia ei Nifä emage, ea mosöa Geleso sosogo gedolo nefolalebe amolimage, amalamu säsimelëla säla imalo.

¹⁶ Beba goda dilia nabaha maademäia nidesa maadelahiläda, Geleso sosogo Eleodisia ami nefolalebe amoliage nabaha maademäia, ilima fisiga gamalo. Hä, beba Eleodisia nefolalebe amolima fisiga gai amo nealahilä, amoge aso, nidemalo.

¹⁷ Agibasa ema dilia ado gomalä sämalö. Dafidilo Geloie hamoi dia hamomäia i amo hamosa maademolöla helësësa namialola säimelëla säla imalo.

¹⁸ Neda Folo, na dili hawiola säla, nihile naaboea dëdësago.*

Neda igi ëfëa galabaia negei neebewe elaboloeo. Godeie ugila negelo dilima diamolöi diamiaia hamesa neawe.

Hä amo.

* **4:14:** Dolö yafiea helësësaleada, beba äudä Ado Mala Hedabi Ulugule Abosolole dëdëi amoleda Ulugu egowea dëdëila helësëi.

* **4:18:** Age Golidi 16.21gi dibe amoge bimalo.

Edolo Bible
Ruth and the New Testament in the Edolo Language of
Papua New Guinea
Sampela hap Buk Baibel long tokples Edolo long
Niugini

copyright © 2010-2022 Wycliffe Bible Translators, Inc.

Language: Edolo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-03-22

PDF generated using Haiola and XeLaTeX on 22 Mar 2024 from source files dated 22 Mar 2024

688323a7-0b01-555d-b52f-07c624ea681b